

ጳውሎስ ኤፌሶን መረሃ ከተሮ ሶህኑተ ኣጉስ

ጳውሎስ ኤፌሶን መረሃ ከተሮ ሶህኑተ ጉዕሚቶን ሄጭ ለለኖሁ «መገኑ ያጀሁ እሆተ ሰማንለክ ኡለን ኖ ከልቁ ጉዕሙንኩ ጭምይ ማጥቾ መሲህ ኢስ ዳኝነት ኣዜን እሆኖ ወክቱ ኢሌእቺት» (1፡10) የኖ ሰውት አሌኒት። ዋሉንገ መሲህ ኢስን ሜጡበ እሁ መጠር መኑ ጉዕሙንኩ ሜጡበ እኩተ ይት ከ አበ ያደተ ሆኅ አሌን ሆስሶተ መገን ኡመት ቃግሰኖሃን።

ኤፌሶን ዋዕኔ ሶህኑተ ከተሮሁ ማጠመተኔሃ ዋኔስ ኣጉ አልባሽተኔሃት፤ እኑ መገኑ ኡመትሰ ሀት መጠርጎሬ፤ ቤትንከሰ መሲህ ኢስን ጩብሀስ ፈቁን ዩ ደእት ሀት ነጠ እሁሰለክ መገን ሎረ ተብሴ ላገት ጠሊሊ አያኒን ሀት አጥራመቱስ ኩለኖ፤ ለንክ ክፍላን ሀትን ከተሮሲሁ አነበባእሩ ሜጡበ ሄእንከሰ መሲህ ኢስን የሰ ሜጡ እሁ ሀንቅ እሆተ ሀት ሄኡ ሀሰሰኖስ ጎሬ ኩለኖ።

መኑ መሲህ ኢስን የሰ ሜጡ እሁ ሀት ሄእኖስ ጎሬ ዎሎ አደደ ሞሳልት ኖ ጠዊን ኩለኖ፤ መገን አመዕናኖ ዱእ ሞኒ ጅሰመ እከን መሲህ ኢስ ጅሰሚሃ ቡዕለሃን፤ አመዕናኖ ዱእ ሞኑ ግንበ እሀን መሲህ ኢስ ሙረበሰየ ክኑ፤ አመዕናኖ ዱእ ሞኑ ሞኒ አመገ እሀን መሲህ ኢስ ሞኒ አንጋት፤ ከተሮሲሁ መሲህ ኢስ አዲን ለሌ መገን ኣሰቱተ አበ ገለትጩን ጠወእኖ ወክት ጠወእኖሁ አበ ጥዕላሻ እኩ ጠዊንት፤ ጉዕሙ ጠወንኩ ለለኖሁ መሲህ ኢስ ኢታን፤ ገዉስ ህግሽ ኣሲን፤ ፈቁን ዩኒ፤ ኣሰቶንለክ ወገሬት አዲኒት።

መጻፍሰ አፎሃ

ኣጉስ (1፡1-2)

መሲህ ኢስለክ አመዕናኑተ (1፡3—3፡21)

መሲህ ኢስን ሃዕሮ ሄኡ (4፡1—6፡20)

መጨረሻስ (6፡21-24)

1 መገን ሰውቲን መሲህ ኢስ አሳቤቹ እኩ ጳውሎሴቶለክ መሲህ ኢስን አመዕነንቶሀኑኡተ።

ኤፌሶንን ሄኣ ጠሊላኖ አመዕናኖተ።

2 እናኔ መገኒቸዎታልክ ቀርቾሃ መሲህ ኢሲቶ አሰቱትላክ ወገሬቱህ ክዕኔሃ እሁን።

መሲሂን ደገንታ በረከተ

3 ሰሜ ቤቸን ጠሊሊ አያኒን ደገንታ በረከን ጉዕሚንን መሲህ አዲን ማሰዕዮኔ ቀርቶኔ መሲህ ኢሲን አኑኔ መገኑ ማሰክሙን።

4 ጠሊሊትላክ ኩሌኖርቹ ዮበእረ እንክ ብሬሰ ደገሞተ ኣዲንያት ከለቀንቱዕነ ሄጭ መሲሂን መጠሮኔ።

5 መገኑ ሀሰኖ ሃሊን መሲህ ኢሰ መሳን እለሰ እንኮተ ሄጭ ኢታንከሰ መጠሮኔ።

6 መገኑ ህካንን አዕዮሁ ኢተሞ ቤትሰ መሳን ኔሳሃ ነጣን አሴኔ ኬዕምኝ አሰቶተ እሱ ገለትጭኖታት።

7 መገን አሰቶ ዊምማቶ ኬሽ ቤትሰ ቄጊን ዎዝኑተ ደእን ጨብሃኔ ማርቱተ ደዕኖም።

8 አሰቱሰ በትሾኔ። ሀይማንላክ ኤንኬዕኒን

9 መገኑ ጎደበ ላፍማንከሰ መሲህ መሳን ሄጭ ያጀገ ሞሰጥር ደንጋምገ አዕዮኔ።

10 ወክቱሰ ኢሊኖ ወክት መገኑ ሆጎን ሆሰሰኖ ኩ ያደሰ ሰማንላክ ኡላን ዮ ክልቀቱ ጉዕሙንኩ ሜጡበ መቶ መሲህ ሹምነት ኣዜን እካጋት።

11 ጉዕመ ጠወንከ ገይሰ ሰውቲን አአኖ መገኑ ሄጭ ያጀ ሃሊን መሲህ መሳን እሰ ወገን እንኮተ መጠሮኔ።

12 ሁኩንን እኮሁ መሲህ ተብሳሃ አኢን ዎኔሃ እንኮምሩ መገን ኬዕምኝ ገለቲን ለሊንሶታት።

13 አዕኑ ሀትን ሀንቅ ላገተ ኩንን ጡምቲንተ እንጂሊ ሞጮጭቲንተ ወክት መሲሂን በርገንቲንታኣ፤ አመዕንቲን እሰን እህን ተብሳሃ እክ አሰሞ ጠሊሊ አያን ማተቢን ዎቀረንቲንታኣ።

14 ሁኩ ጠሊሉ አያኑ መገኑ ገይሰረ እኮረ ጉዕመንከ ዎዞተ ኢሊ ርሰቲህኔ ሩብት እህኖሃ ቀብደ፤ ሁኩንን ክዕምኚህሰ ገለትሃን።

ጳውሎስ ኤፌሶን መኒሃ ዱአ አዕዮገ

15 ህካን እኮቤቺሃ ቀርቾ ኢሳን ዮህዕኔ አመዕነትላክ አመዕናኖተ ጉዕሚንከ ዮህዕኔ ኢተተ ሞጮጮም ወክቲቶ ኬሽ

16 ክዕኔተ ዱአን ቃገን ክዕኔ መሳን መገኒሃ ገለት ሆንጠህሱኤ አጉራምበእ።

17 ኬዕምኙ ሀሰሰኖሰ ቀርቶሃኔ መሲህ ኢሰ እነ መገኑ በትሴን ደጎኖተ ሀይመ አያን ኣሶህዕኔተላክ ገውሰ ለሊሶህዕኔተ ዱአ አአም።

¹⁸ ሆትኔ ተብሎሃ ገእንቴንታጎሬ ጠሊላኦት ረገእ ኬዕምኣ ርሰቱ ሄንከ ልግብየ ጎሬ ደጎኖተ ቀልብክዕኔ እልት ፈንተኦተ ዱኣ እኣም።

19 ዋለአንተበ ሎረ ዋልቀሰ ኔሳሃ አመዕንናምሀኑኡተ ሄንከ ሎረሃ ጎራ ደጎኖተ ዱክ አኣም፤

20 ህክ ሎረ ዋልቀሰ ሆጎን ለሊሾሁ ሬሆኝ ኬሽ ሰማን መኬንከሰ ኦፋሼ መሰህ አደንት።

21 እኔ መገኘት መሲህ ሰማን መከንከሰ አፋሼኢሁ ጉዕመ
ዳኝነቲቸላከ ዋልቃች ቀርቻች ሎረ ህትን ከን ኣዲንያ አሌን
ጠለዕል እሁዕን አሜተሮ ኣዲንያ አሌን ሱዕሚች ጉዕሚችን ሎረ
እኮ ኩዕመኝ ሱዕመ ኣሰንት።

22 ጉዕመ ጠወንከ ደኣነትሰ ኣዜን ኣዕይ ጠገመኖገ ኣዕዮሰ፤
መገን ኣመዕኖኖ ዱእ ምኒ ጉዕመርቸንን ቡዕላ ኣዕዮሰ።

23 መገን አመዕናኖ ዱእ ሞኑ መሲህሃ ጀሰመሃን፤ መገን አመዕናኖ ዱእ ሞኑ ጉዕመ ጠዋን ወመ አእኖሴ እሱን ወመ እኮእተ።

2

ጌሆኝ ሄጊቤቼ ቶሎ

¹ አዕኑ ቤዕ-ክዕኑላከ ጩብክዕኑ መሳን ራቴንተእረ እቅ።

2 ህክ ወክት ከገን አዲያ አል ሂለ ዋቃሃ አዋንቴንገት እቅ፤ ህትን ቦብር አሊን ሂላ ሂለ አያንቀርቻዊት (ጠገንቴንገት እቅ፤ እሰን መገኒሂ አዘዘንታቦእ መን አሊን አኔሂ ሂለ አያን።

3 ነሱ ጉዕሙ ነገሩ ከነች ብርተ እስ በላን ማልኔ ያደተለክ ቀሉብኔ ስውት አዋነን ማልኔ ሄዕላቻን ሄዕናምረ እቅ፤ ዋሎ አዘዘንትበ መንገን ክልቀትንከኔ መገን ኡሙዕሪ ኣዜን ሄዕናምረ እቅ።

⁴ ጠዉ እኮጎሬ መገን ማርቱት አበ እህንከሰለከ ኔሳሃ ዮሰ ኢተት ሎረ እህንከሰ

⁵ ሴባንክ፣ ሬኖምረ እንኮም እቃ መገኑ መሲሂን ፎሊን ሄዕኖተ ኣዕዮኑ፤ ኣዕኑሁ ጡሚቴንታሁ ኣሰቶንከሰት።

6 መገኙ መሲህ ኢሰ ኦዲን እሲንን ሬሆች ኬሽ ሰማን እሲን ሜጡበ ኦፋሹኑ።

7 ህፃናን አዕዮሁ መሲህ ኢሲን ኔሳሃ ለልሾ ማርቱሰለከ ዋሊንሹ የበእ ኣሰቶ ቀባጡተ አሜተኖ ዘማን ለሊሶኔተ ይይኹ።

8 መሰንቲሰ አዕኑ ጡምቴንታሁ አመዕነት መሳን አስቶንከሰት፤ ሁኩንን መገንተ አሰቱ ቤሉ ክዕኔ ሆነን ደገሞበአሃን።

⁹ አዲሱ ድክአኖበእገ ጡሙ ደገመኖሁ ሆኅኒበእ፤
¹⁰ ነኩ መገኑ ሃጭ ቅጥአዕዮ ጡመ ሆጉተ አዕናተ መሲህ ኢሰ
 አዲን ለንኪሃ ከለቀሞምሃ መገኒሃ ክልቀት።

መሲህ ኢሲን ደገንታ ማጠመተ

¹¹ ህካን እኮቤቹሃ አዕኑ ዋዕናሃ ክልቀቲንከክዕኔ አይሁደ
 እኬንበሩ፤ አይሁድ መኑ መን አንጋን ጡርከመንት ሄኦገን ክዕኔተ
 ጡርከመንቲንታበእሩ ይተን ቦርርተንክዕኔ ሄኦገ ቃጌ።

¹² አዕኑ እስራኤል መነ እኬንበሩ ተብሲ ላገ ወኣዲሃ ኮህቹ
 እኬንተሩ፤ ከን ኣዲንያ አሌኒ መቼ ተብሶሁ ዮህዕኔበእሩ፤ መገኒት
 አደ ሄኤነንተሩለከ መሲህት አደ እኬንተረ እሁክኔ ቃጌ።

¹³ ቴሱ እኮገሬ አዕኑ ከኒች ብርተ ቄዕርቲን ሄኤነተሩ መሲህ
 ኢሲረ እኬን እሰ ቂጊን ሆንጠኬንታኦ።

¹⁴ መሰንትሰ አደ አዕዮኔ ብተ ግድግደ ድጃኢሁ፤ አይሁደለከ
 አይሁደ እክበረ ሜጡ አዕዮ ወገሬቲኔ መሲህት።

¹⁵ ለሞንከ ኡመቲች እሲን ሜጡ እኮ መቼ ሃዕር ኡመት ከለቆተ
 አይሁድ ሕግ ትዛዝለከ ሴራ ማሊንከሰ ሻር ወገሬት አዕዮ።

¹⁶ እሲን መሰቀል አሌን ሬሆንከሰ ድኖመተ ቤሾ፤ ለሙንከሰ
 ሜጡ ጅሰመ አዕይ መገኒን ሀራርሴሰ።

¹⁷ አሜች ክዕኔሃ ቄዕርቲን ሄኤነንተሁኡተለከ ሆንጠክ ሄኦ
 አይሁዲሃ ወገሬት ተማርሴኦ።

¹⁸ እሰ አዲን ጉዕሙንኩኔ መቶሃ አያኒን አዎን መገን ቤቹ
 ሆንጠንካሞ።

¹⁹ ህካን እኮቤቹሃ አዕኑ መገኒሃ አደ እኮሀኑኡን መቶሃ ባድሃ
 መነለከ መገንዩ አበርሰ ቤሉ ከኒች ኤተርን ኮህቻኑተለከ ዋሎ
 ቤቹች አሜቲንታእራበኦ።

²⁰ አሳበለከ ነቢያኖ ቀበብ አሌን እጃረንቲንታእራን፤ ሙረበ
 ቡዕል ክኑ መሲህ ኢሳት።

²¹ ግንቡሰ ጉዕሙንኩ እሲን መክ ቀርች ጠሊለ ምኒ እሆተ
 ነጻኖ።

²² መገኑ አያኒንከሰ ገለኖ ግንበ እኮኖተ አዕኑሁ በርገንቲን
 መሲህን መክቲንተ።

3

ጳጳሱ አይሁደ እኮበእ መንቤቸን አዕዮ ሆጉተ

1 ህካን እኮቤቹሃ እን ጸጧሎስ ክዕኔሃ አይሁደ እኬንበሀኑኡተ ይመሲህ ኢስ ካዲንቹ እህንከኤ ኡሱረኘሃን።

2 ክዕኔሃ ደግለለኖግ አኦተ መገኑ አሰቶንከሰ ካደሞሰተ እድል አሴኤገ ሀንቂንከ ሞጮጭቱንታኦ።

3 እን ሄጮ ገበንቹ አዕይ ከተቦክዕኔገን መገኑ ማጠሞርቹ ለልሾኤ።

4 ህካን እኮቤቹሃ ካን እነበቤነንተ ወክት መሲህ ማጠሞርቹ ሚጌስ ኣጎኤ ጎር ደጎኖተ አታልቱነንተ።

5 ኩ ማጠሞርቹ መገን እያኒን ጠሊላኖ አጎባተሰለከ ነብያኖተሰ ቱሱ ለሌ ሃለን ህጎ ዘማኔን ሄኦ መኒሃ ለልዮበኦ።

6 ኩን ለሊሰኖሁ አይሁደ እህቡ መኑ አይሁዲን ሜጡብ ርስተ ረገኣእረለከ መቶ ጅሰም ብለተ እክ መገኑ አሴ ተብሳሃ እንጂል አዲን መሲህ ኢስ ቤቀማኑተ እሁሳት።

7 መገኑ ዋልቃንከሰ አሴኤ አሰቶን አኒሁ ከን እንጂል ካዲንቹ እኮም።

8 እን ጠሊላኖች ጉዕሚችን ሆፈአሚሃ እኮምጎሬሁ ዳንጉ ዮበኦ መሲህ ቀባጦ እንጂል አይሁደ እህበ መኒሃ ዱዱብሶተ መገን አሰቶን ኩ ዕድሉ አሰሞኤ።

9 ህትን ህጎ ዘማኔን ጉዕመንከ ከለቆ መገኒን ማጠም ሄዕዮ ሞሰጥር መገን ያደት መሃጎር ጉዕሚንከ ለሊሶተ አሰቱት አሰንቶኤ።

10 ሁኩንን እኮሁ ከን ዘማኔን አመዕኖ ዱእ ሞኒ አዲን ሰማን ሄኦ ሹመትለከ ሀለቀት መገን ኤንኬዕኑ አደደ ደኒን ደጋገት።

11 መገኑ ቀርቹሃኔ መሲህ ኢሲን ካን አዕዮሁ አበ ዘማኒች ብርተ ያጁ ሃለኒት።

12 መሲህረ እህንከኤለከ እሲን አመዕኒንከኔ መገን ብሬን መለልን አመዕነትን ሆንጠሁ አታልናም።

13 እን ክዕኔተኔሃ ቶጋም ኦርሸት ኬዕምኣክዕኔ እኮቤቹሃ ኦርሸኤ መሳን ተብሳሃ ሙርቶኖቹ ይ ኡጫንክዕኔ።

መሲህ ኢተተ

14 ቱሁ እን መገን ብሬን ጉሉቤንከኤ ጉሉጽ ዱእ አአሚሁ ከን መሳኒት።

15 ሰማንለከ ኡላን ዮ ጉዕሙንኩ አበሮሱ ሱዕመሰ ደአኖሁ መገኒችት።

16 መገኑ ኣዝ ጅሰመክዕኔ ጠረኣሰኖ ዋልቀተ አያንሰ መሳን ኬዕምኣሰ ሎርመተ አሶህዕኔተ ዱእ አአም።

17 ህትን መሲህ አመዕነቲን ቀልቤንከክዕኔ ሄኦተለክ አዕኑሁ ጠጸ አቴን ኢታን ጠረኝቴንተረ እኮኖተ ዱኦ አአም።

18 ቴሁ መሲህ ኢተት አልባዕልመሰለክ ቄዕራሽመሰ፡ ጎቴመሰለክ ጥዕላሽመሰ ሄንከ ጎሬ ጠሊላኖን ሜጡበ ሰውዩ አታልቶኖተለክ

19 መን ኤንኬዕኒቶ በተኦ መሲህ ኢተተ ደጎኖተ መገን ዊምማን ዊመ እኮኖተ ዱኦ አአም።

20 ህካን እኮቤቹሃ ኒ ኦዜን አታ ዋልቀሰ መሳን ኡጭናምለክ ሰውይናምሀኒቶ በትሽ ደፈፍሽ ኦሶተ አታለመኖሰ መገኒሃ

21 እሲሃ አመዕናኖ ዱኦ ምኒ መሲህ ኢሰ አዲን ዘማኔን ጉዕማን ዘላለሚቶ ዘላለሚሃ ኬዕምኖ እሲሃ እሁን፤ አሚዕን።

4

መሲሂን ዮ ሚጠመተ

1 ቀርቼ ካደምንከኤ ኡሱረኛ እኮም አን ገአንቴንተ ገአሚሃክዕኔ ሀሰሰኖ ሄኡ ሄኦኖተ ኡጫንክዕኔ።

2 ኢታንለክ ገገዊንከክዕኔ አታዕሊን ጉዕመ ወክት ገዉ ሆፍሲንለክ ጎደብ ላፍማን መት-መቱ አታዕለቀሚን ሄዕዬ።

3 ወገሬቲን ሚጡ እኬን መገን አያኒን ደገመኖ ሚጠመተ ጠረኝሴን አገሬ።

4 አዕኑ መቶ ተብሴሃ ገአንቴንተሀንገን መቱ ጅሰሙለክ መቱ አያኑ ዮኡ።

5 ህትን መቱ ቀርቼ፡ መቱ አመዕነቱለክ መቱ ጠመቀሙ ዮኡ።

6 ጉዕሚቶን ሎረ እኮሁ፡ ጉዕማንን አአኖሁ፡ ጉዕማንን ሄአኖሁ፡ ጉዕሚንከ አን እኮሁ መቱ መገኑ ዮኡ።

7 ጠዉ እኮጎሬ መሲህ ኦሶተ ሀሾ ጌሲን መት-መትሃኔ መገን ኦሰቱት ኦሰንቶኔ።

8 ሁኩንን

«አሌ ፋሎ ወክት ልግብ አገንቶአረ እእ ኦሮዕዮ፤

መኒሃ ሽልማት ኦሴእ» የመሞጋት።

9 ህከረ ሁኩ «አሌ ፋሎ» ይታ ላገት ሄጭ ኡላቶን አበ ጥዕላሽ ቤቹ ድሩ እህባቶ ዋሉ መ እሆተ አታለኖ?

10 ኩን ጥዕላሽ ቤቹ ድሬኢሁ ህትን ጉዕመንከ ዊመ አኦተ ሰሜቶ ጉዕሚቶን አሌ ዋል ፋሎሁ እሶት።

11 እስን መት-መቱስ አሳበተ፥ መት-መቱስንገ ነብያት፥ መት-መቱስ እንጂሊ ዱዱብስታእረ፥ መት-መቱስንገ አመዕናኖ ዜማኑተ፥ መት-መቱስንገ አስተማረተ እካገ ሽልማት አሴሰ።

12 ካን አዕዮንኩ መሲህ ጅስመ እኮእ አመዕናኖ ዱእ ሞኒ ነሲሃ አመዕናኑተ አመዕነት ክድማተ ቅጥ አእሃት።

13 ህትን መገን ቤቱ ደገን አመዕነቲን ደገመኖ ሜጦመተ ኢልን መሲህ ዊመ እኮገን ነኡሁ ዊመ መነ እንክ ነጽኖታት።

14 ከኒች ኤተሮን መን ተንኮ ክዝቢንለክ ጣንሲን ቅጠሞ ክዝብ ትምርቲን ቦብሩለክ ዊ ሁሉ ከበሃ ካጸ ሀንበለንት መርታ ጨለገ እንካምበእ።

15 በትሽን ሀንቅ ኢታን ጠወዕነን ጉዕመ ጅስሚሃ ቡዕለ እኮ መሲህበ ጉዕመርቺን ነጽኖም።

16 አደዱ መኖመ ጅስሙ መቱ እሀኖሁ መሲሂንት፤ ጅስሙ ጉዕሙንኩ ሜጡ እኮሁ መኖመት ደቀንታ ቤችኒት፤ ህካን እኮቤቺሃ መት-መቱ ጅስም ብሊቱ አስሞስ ሆጉተ ብዝ አዕይ አእኖ ወክት ጅስሙ ጉዕሙንኩ ነጻኖ፤ ገውስ ኢታን ነስኖ።

መሲሂን ደገመኖ ሃዕሮ ሄኡ

17 ከኒች ኤተሮን ሰውቱስ ተሰ እኮ አይሁደ እክበ መንገ ሄኡኖቼ ይ ቀርቻ ሱዕሚን ጠረኝሽ ኩላንክዕኔ፤

18 እስ ቀልቡ ቱንሰዮኡ፤ ህትን ቀልብ ዱድማች ኬዕዮሀኒንለክ ኤንኬዕኔ ሆግስ መሳን መገኑ አሰኖ ሄኢች አደ እኮኡ።

19 ሙልት ሰውቱስ በዕዮቤቺሃ ንጅስ እኮ ጠወ ጉዕመንከ አኢሃ ገዉስ ሙልሰኖ ማልስ ሄዕላቻተ ሆግስ አቶኡ።

20 አዕኑ እኮጎሬ መሲህ ደገንታሁ ህትናሞ ዋቄንበእ።

21 ሀንቅንከ እስተኔሃ ሞጮጭቲንታክ፤ ህትን እሲሃ እኬንተቤቺሃ ሀንቁንኩ ኢሳን ሄኡስ ተማርቲንታክ።

22 ህካን እኮቤቺሃ ጣንስ ጨብቤቼ አዎንሰኖ ሄዕላቻን በዕዮ ዋዕናሃ ሄኤነንተ ኑባጴ ሃለት ከሜ።

23 ቀልብክዕኔ ሰውቱ ሃዕሮ እሁን።

24 ሀንቅ ፈይማንለክ ጠሊልማን መገን ሞሳሌን ከለቀሞ ሃዕሮ ክልቀት ኦደዕዬ።

25 ህካን እኮቤቺሃ ክዝብ ጠወኡኖቼ፤ ጉዕሙንኩኔ መቱ ጅስመ እንኮምቤቺሃ ገገዉንኩኔ ሀንቅ ጠወዕኖ።

26 ኡሙዕርዬ! ኡሙዕርቴንተጎሬሁ ጨብ አቶኖቼ፤ ህትን ኡሙዕርቴንተገን አሩ አጉንከ።

27 ህትን እልብሲሃ ሆሮን ቤቼ አቶኖቼ።

28 ህትን ሞገኖሁ ከ ኤተሩ ሞጉንከ፤ ጠዉ እኮጎሬ ህከን ወጥ ኦርጨቀሞህኒሃ አሶተ ገይሰ አንጋን ጡመርቹ አኡን።

29 ሆሮ አፊችክዕኔ ሂላ ላገት ፋልቱንከ፤ ጠው እኮጎሬ ሞጮጪኖህኒሃ ተሸየኖለከ ጠረኝሲሃ ደግለለኖ ጠወ ጠወዕዬ።

30 ህትን ዎዘንቴንተ በሬተ ዊመ እሆህዕኔተ አሌክዕኔ መተብገ ዎቀረሞ ጠሊላ መገን አያነ ሻዝሶኖቼ።

31 ህትን ቀራርሰጩ፥ ንዴት፥ ኡሙዕርት፥ ጨንጨነተ፥ ያርት፥ ቦርዕረንሹለከ ሂላ ጠዉ ጉዕሙንኩ ክዕኔች ካጸ ሸቁን።

32 ህትን መት-መቲሃክዕኔ ጡማኑተለከ እሙዜንተረ፥ ጎደበ ላፋኑተለከ መረርሲጫኑተ እኬ፤ መገኑ መሲሂን አጉሮህዕኔገን ገገዊንከክዕኔ አጉዕራቀሜ።

5

ኑር አዜን ሄእተኔሃ

1 ኢቲኖ ኦሶገ አዕኑሁ መገኑ አዎንቴንተረ እኬ።

2 መሲህ ኢቲኔገን መገኑ ተሸ አእኖ ጡሙ ሽቱት ዮስ ክትሞ አዕይ ገውሰ ኒተኔሃ ህግሽ ኣሴገን አዕኑሁ እስ ኢታን ሄዕዬ።

3 ህትኔ ጠዉ መገን ኡመቲሃ ሀሲሰኖበእቤቼሃ ዝነት ህከረንገ ዎሉ ንጃስ እኮ ጠወ አኡ ህከረንገ ጎራሜቹ እሁ ፈቅ ሞጮጪሁ ሀሰሰኖበእ።

4 ህከን ወጥ መገኒሃ ሹኩሪ ሆንጠህሺ ቤሉ ሂለለከ ገወ ጠወ ህከረንገ ሂላ ቀልድ ጠወ ጠወኡ ሀሰሰኖህዕኔበእ፤ ህትኔ ጠዉ ክዕኔሃ መከኖበእ።

5 ዝነተ ህከረንገ ጉዕመ ንጃስ አኡ ህከረንገ ሸርኬሃ ሰገድገ ዮ ጎራሞመተ መሲሂንለከ መገን ዎምነቱን ቤቹ ደእኖበእገ ደጌ።

6 ከን ጠው መሳን አዘዘንታበእ መን አሌን መገን ኡሙዕርት አሜታቤቼሃ አዪሁ ተሰ ጠዊን ጣንሱንከህዕኔ።

7 ህካን እኮቤቼሃ ከን አዘዘንታበእ መኒን ሜጡ እኮኖቼ፤

8 ዎዕናሃ አዕኑ ቱንሰቼሃን እቅ፤ እኮጎሬ ቱሱ ቀርቹረ እኬንተቤቼሃ ኑርሃን፤ ህካን እኮቤቼሃ ኑር አዜን ሄእኖ መኒን ሄዕዬ።

9 መሰንትሰ ጡሙ ጠዉ ጉዕሙንኩ ፈይመለከ ሀንቅ ላልቹ ደገመኖሁ ኑርቹት።

10 ህካን እኮቤቹሃ ቀርቼሃ ተሽ አእኖስ ጠዉ መሃጎሬ መረመርቱን ደጌ።

11 አዕኑ ህከ ላልቹ ዮበእ ቱንሰች ሆጉተ ፋሽቱን ለሊሼ ቤሉ ህከን ሆጎን ሀዕላቀንቶኖቹ።

12 ቱንሰችን ሄኣ መኑ ማጥ አታ ጠወ ጠወኡ ሙልሲሰኖ።

13 ጉዕመርቹንኩ ኑርቤቹ ፋለኖረ በራ እክ ለለኖ።

14 በራ እክ ለለኖ ጠዉ ጉዕመንኩ ኑርሃን፤ ህካን እኮቤቹሃ «አት ኩ ግሳንቲሁ በቅይ! ሬሆች አደ እክ ኬእ!

መሲህ ኑር ለሊሰኖሄ» የመሞኡ።

15 ቲሱ ሀት እኬን ሄኤነንተጎሬ አጥራመቱን ሰውይዬ፤ ሀይቾ መንጋት ቤሉ ገዋኖገ ሄኣኖቹ።

16 ኩ ዘማኑ ሂለ እኮቤቹሃ ወክትክዕኔ ከልባን ቤሶኖቹ።

17 ህካን እኮቤቹሃ ቀርቻ ያደት መሃጎር ሰውይዬ ቤሉ ገዋኑተ እኮኖቹ።

18 ሀትን ጠሊለ አያኒን ዊሜ ቤሉ ሂለ ዎቃሃ መሰኖህዕኔቤቹሃ ወይን ጠጂን ሰከርቶኖቹ።

19 ሀትን መዝሙራን ገለቲን አመዕናኑት ዘመርታ ሃለን ገገዊንከክዕኔ ጠወዕዬ፤ ገለቲንለከ መዝሙርን ዊመ ቀልቢንከክዕኔ ቀርቼ ገለትጭዬ፤

20 ቀርቼሃኔ መሲህ ኢስ ሱዕሚን ጉዕመ ጠዋንከ እነ መገኑ ጉዕመ ወክት ገለትጭዬ።

ምኒ እንለከ ምኒ አመተኔሃ

21 መሲህ ከበጂሃ ዮሀዕኔ ዋጃቶች ኬዕዮሀኒን ገገዉንኩክዕኔ መት-መትክዕኔ ትዛዝ ቶጌ።

22 ምኒ አማኖ! ቀርቻሃ ኢሲሃ አዘዘንቲንተሀንገን ምኒክዕኔ አናኖተ አዘዘሜ፤

23 መሲህ አመዕናኖ ዱእ ምኒሃ ቡዕለ እኮገን ምኒ አኑሁ ምንስ አማተ ቡዕለሃን፤ ሀትን መሲህ ጅሰመ እኮ መገን አመዕናኖ ዱእ ምኒሃ ጡምሳንቹሃን።

24 አመዕናኖ ዱእ ምኑንኩ መሲህሃ አዘዘንታገን ሀትን ምኒ አማኑት ምኒ አናኖተስ ጉዕመ ጠዋንን አዘዘንቱን።

25 ምኒ አናኖ! መሲህ አመዕናኖ ዱእ ምኒ ኢቱገለከ ገዉስ ህግሽ ኣሴገን አዕኑሁ ምኒክዕኔ አማኑት ኢትዬ፤

26 መሲህ ህካን አዕዮሁ አመዕናኖ ዱእ ምኒ ጠሊለተ አኑተ ሀሽት፤ ነጠ አዕዮሴንኩ ላገሰ መሳን ዊን ኣንሸንት።

5:16 ቆላ. 4፡5። 5:20 ቆላ. 3፡16-17። 5:22 ቆላ. 3፡18፤ 1 ጴጥ. 3፡1።

5:25 ቆላ. 3፡19፤ 1 ጴጥ. 3፡7።

27 ከን ሃሌን ጡሩ ህከረንገ ሚንተ ኡሱሩ ህከረንገ ካን እጉደኖ ደገሙዕነ ጠሊለተ፥ ኩሌኖርቹ ዮበኢተለከ ምልካምተ አዕይ ገይሰቤቹ ሆንጠህሰኖ።

28 ህትን ምኒ አናከት ገይሰ ጅሰመ ኢትታህንገ ምንሰ አማኑተ ኢቱ ሀሰሰኖሰ፤ ምንሰ አመተ ኢተኖሁ ገወሰ ኢተኖ።

29 ገይሰ ጅሰመ ግበኖሁ አዪሁ ዮበኢ፤ ህከን ወጥ መሲህ መገን አመዕናኖ ዱእ ምኒ እእኖ ሃሊን ገወሰ እትሰኖ፤ አገረኖሁ።

30 ነኡ መሲህ ጅሰምሃ ብልት፤

31 «ከን መሳን መኑ አነሰለከ አመሰ አጉር ምንሰ አማን ሜጡ እሀኖ፤ ለሙንኩሰ መቱ ጅሰመ እካእ» የመሞኡ።

32 ኩ ምሰጥሩ ሎረሃን፤ ካን ያሚሁ መሲህተኔሃለከ መገኑ አመዕንቶ ዱእ ምኒ ምሳልተ አዕዪት።

33 ጠዉ እኩገሬ ኩ ጠዉ ክዕኔንተ ለአኖ፤ ህካን እኮቤቹሃ ምኒ እኑ ምንሰ አማተ ገይሰገ አዕይ ኢቱን፤ ምኒ አመት ምንሴ እነ ኬዕምሱን።

6

አናከተ፥ አማኖተለከ ኦሶተኔሃ

1 ኦሶ! ሀሰሰኖ ጠወ እኮቤቹሃ ቀርቹን አናኖተክዕኔለከ አማኖተክዕኔ አዘዘሜ።

2 «ህትን አነክለከ አመክ ኬዕምሰ» የኖ ትዛዙ ተብሴ ላገት ዮሰ ዋኔሃ ትዛዝ፤

3 ካን አቶንትጎሬ «ጉዕሙ ጠዉንኩ ጡመ እሀኖሄ፤ ከን ኣዱንያ አሌኒ ኡሙሩክ ዱንከኖ» ይታእታን።

4 እዕኑ አናከትለከ አማኑት! ቀርቾ ኢሲን ጡመ ዋቃሃ ተማርሰቲነን፥ ሸዜነንለከ ሻቄነን ነሰዬሰ ቤሉ እለክዕኔ ኡሙርሲሶኖቹ።

ቀርቻኖተለከ ርሰተኔሃ

5 እዕኑ ርሰት! ዱንየ አል ቀርቻኑተ እኮህዕኔሀኑኡተ ዋጃንለከ ሁጢን አዘዘሜ፤ መሲህ ካደንቲነንተ ሃሊን ጡመ ቀልቢን አዘዘሜሰ።

6 አዘዘንቲነንታሁ መገን ሰውት ቀልቢች አታ መሲህ አሳበገ እኬኒት ቤሉ መነ ሙንደእሰሲሃ ይቲን ለልጪሃ እሁንከ።

7 መነ እሁዕነ ቀርቹ ካደንቲነንተገ አቲን ጡመ ቀልቢን ካደሜ።

8 ርስ እኮ ሰዎልድቼ ገገዉስ አቶ ጡመ ሆኅን ቀርቼች ዋጋ ቶጋኢሃ እሁስ ደገነንተ።

9 ህትን ቀርቻት! መን ሚንተ ለዕይ ኅልበ ክዕኔለክ እስ ቀርቼ ሰማን ሄኡስ ሰውይቲን ዋጅሲሱክዕኔ አጉርቲን ርሳተክዕኔ ጡመ አዕዬ።

መገኑ አሰኜ በገዝ ኦዳተ

10 ቀርቻንለክ እስ ሎረ ዎልቃን ጠረኝዬ፤

11 ሻይጣን ሂለ ሆጉተ ግቦኖተ አታልቲነንተ መገኑ አሰኖህዕኔ በገዝ ኦዳተ ጉዕመንከ ኦደዕዬ።

12 ኒ ኦሉ መኒን እሁዕን ከን ኣዱንያ አሌን አታ ገሻኖ፤ ሹማን፤ ከን ኣዱንያ አል ዎልቃንለክ ኡላች አሌን ሄኣ ሂለ አያኒ ዎታደርኒት።

13 ህካን እኮቤቹሃ ሂለ በር ባለጋር ዎልቀተ ፈንቀሽቶኖተ አታልቲነንተለክ ጉዕመንከሰ ሹልቲን ጠረኝቲን ኡሪሃ አታልቶኖተ መገን በገዝ ኦዳተ ጉዕመንከ ቆዕርዬ!

14 ቲሱ ሀንቅ ዝናርገ ረመዞንከክዕኔ ቆዕርቲን ወዘናን ኦደኤኖ በገዝ ኦድናገ ፈይመ በገዝ ኦዳተ ኦደኤን፤

15 ወገሬት እንጂሊ ዱዱብሲሃ ተቃጠቡክዕኔ ጫዕመገ ሎካንከክዕኔ ዎዕርቲን ኡርዬ።

16 ከኒች ጉዕሚችን አበ ጊረ ለበነገ ቡብኖ እልብስ በገዙ ጉዕመንከ አሊችክዕኔ ከዕሙ አታልቲነንተ አመዕነቱ ጌሬንጌርገ አፌ።

17 ጡሙክዕኔ ብረት ቆሚገ ቡዕላንከክዕኔ ወዕርዬ፤ ህትን ጠሊሊ አያኒች ደገመኖ ሲፈ ሁኩንን መገን ላገተ አፌ።

18 ጉዕመ ወክት ጠሊሊ አያነ አዎንቲነን ዱኣ አዕዬ፤ ከን ሃሊን መገኑ መጠሮስ መኒሃ በቅ ይቲንለክ ጠረኝቲን ዱኣ አዕዬ።

19 እንጂል ሞሰጥር መለል ኩሎተ ጠወኣም ወክት ሀሰሳ ላገት ኣሰንታኤገ ኤሳሃ ዱኣ አዕዬ።

20 ቲሁ ሰንሰለቲን ኡሱረም ከን እንጂሊሃ ኣሳቤቹሃን፤ ህካን እኮቤቹሃ ሀሰሰኖገ መለል ጠወኣተ ዱኣ አዕዬ።

መጨረሻ ወገሬት

21 ኢተሞ አመኔቤቱለክ ቀርች ሆኅን አመዕነሞ ካድንቹ ቲኪቆስ እን ሀት ዮም ኅሬ መ አኣም ኅሬ ጉዕመርቹንከ ኩለኖህዕኔ።

22 ህካን እኮቤቹሃ ነኡ ሀት እንኮምኅር ደኅናተለክ ክዕኔተ ጠረኝሶህዕኔተ ይ እሱ ክዕኔቤቹ ሶኮም።

23 እነ መገንለከ ቀርቾሃ መሲህ ኢሰን ወገሬቱለከ ኢተት አመዕነቲን ሜጡበ አመ ኦሶተ እሁን።

24 ሙርተአበ ኢታን ቀርቼኔ መሲህ ኢሰ ኢትታሀኑኡተ ጉዕሚንከ ኣሰቱት እኩንሰ።

ሃዕር ወኣድ መጻፈ

Alaba-K'abeena: ሃዕር ወኣድ መጻፈ (New Testament)

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d